



太師誠意伯劉文成公集卷之八

銘

尊聞堂銘

後學麗水何鍾編校



皇降恒德我儀受之情牽物交民鮮克有之卓彼聖哲有開
于先弘猷秩昭績緒維賢凡有所聞恭敬奉持造次必將屋
漏勿欺洋洋鬼神號號震霆寢斯食斯或敢弗承厥聞伊何
闕疑擇善靡聖天只克念不遠人亦有聞罔知所擇揚墨仁
義乃德之賊亦既擇止罔知所尊郭公善善國喪身奔聞義
必為聞過必徙能尊能行是謂君子戴生有堂扁曰尊聞用

宏厥理昭以銘文

敬齋銘并序

敬齋者篤列圖彥誠所以名其居室也彥誠以科第發身其於敬字之義蓋亦講之熟矣則舉其所知而行焉可也又何必多求乎人之言哉乃勉而為之銘銘曰
莊其外而肅其內瓊琚玉佩無顯無昧惟鬼神是對肆遺蹶弗憤以不越載以求無有悔

奎上人耘杖銘

奎上人得古藤以為杖而置鋤焉將以兩其用也名之曰耘杖而劉基為之銘曰

留可以取魚而不可以繫駕帶可以繫襦而不可以貫珠孰眇其癯而多乃需既予老是扶又葳蕤之除俾康勿超以弗迷厥塗杖乎杖乎歲月逝夫子也予俱

朱伯言硯銘

鑿而容既澤既礪俾椎以為鋒克相予工厥惟爾庸予所弗工維予之恠恠式蠱沒以攻無貽爾悞

紹興能仁寺鍾銘并序

頰翁禪師既住大能仁寺之明年新鑄大鐘成括蒼劉基

銘之曰

赤重之金耶溪之銅弗鐫弗鋒而以為吾鍾撻之鐺鐺靡幽

不通以暢八風闔陰闢陽式贊化功於萬億年與皇家相為
無窮

醒齋銘 并序

醒齋者蘧君德芳所以自名其居室也蘧君少嗜酒數為
酒所困一旦忽思古人之所以喪其身覆其家者大率多
於酒遂絕旨酒而以醒齋署其居用以朝夕警省而杜其
欲於將萌也括蒼劉基聞而喜其善脩慝也故為之銘使
揭于楣且以堅其志銘曰
禹疏儀狄祗承虞帝湯做酣歌用末厥世維衛武公初造有
詩年踰九十令聞不墮在魯仲尼酒不及亂範模萬古愈

彌粲羲和酒淫亂后徂征楚國皆醉鄢郢榛荆次公北闕仲
孺東市狂談醜罵身戮家毀吾以是知昭昭生于惺惺而憤
憤出于冥冥劉曜受執孔融被刑莫不因此以殘其形古稱
覆轍後車勿蹈有縱弗防禍生所好人孰無過弗改維咎知
過而改何過之有維敬與怠狂哲攸分敬醒則存不醒則昏
于嗟蘧君以我諄諄止爾醺醺有茁弗芸視此銘文

善齋玉兔泉銘 并序

自古有以勢軋天下箝人口使和已者鮮不由細微以及
大此姦人之素能也故高之馬莽之祥瑞惟其言而莫之
違然後大詐行而大欲得矣秦檜之事宋高宗也以岳將

軍之武之忠且排構之殺其身以及其子反以為功而宋
之君臣莫不從其指則亦何求而不得哉玉兔之泉以清
美為建業城中第一豈昔顯而今堙者檜實知之耶或有
善察土脉工穿井之術者密以語檜而神之以白兔耶則
皆不可知也夫檜之罔民設詐豈下於高莽哉白兔之是
非無關天下之大事是故賢人君子忽之而莫與較於是
乎鄙夫諂子遂探其意而夸之以為佞是蓋不足辯也金
華張孟兼憫泉之芳潔為姦人所污而銘以雪其冤愛物
之良心也予亦悲之為之作後玉兔泉銘銘曰

嗚呼泉乎夫何辜為檜所污世無吳隱之孰昭其誣嗚呼泉
乎危父大聖猶言其主瘠環與癰疽白兔之傳夫何傷於
歟檜死為蛆泉潔自如我作銘詩衆惑斯祛嗚呼泉乎終古
弗渝

王原實裕齋銘

會稽王原實以裕名其齋括蒼劉基為之銘曰

寬而舒綽綽乎有餘佩裾與與有容弗藉德人之間過者式
諸

頌

梅頌并序

吳興章仲文集室花谿之上環植梅焉命之曰梅花之莊

予與仲文交敬其好學而知德也知其有取於物不徒矣
乃效屈子頌橘之體而作頌曰

朱方之秀梅實碩兮含章而貞受命獨兮扶疎蕭森清以直
兮玄冰互寒不撓其節兮玉之潔兮夷之特兮閉而發兮芳
郁烈兮黃中絳跗美而完兮麗而不淫物莫能干兮冬榮夏
實含陰陽兮青黃參雜以和羨兮文質彬彬德之儀兮君子
之象君子之宜兮

箴

順齊箴為夏仲珩作

二儀茫茫繫理是物判以兩途維逆與順理之所在漠乎無

形曷予求之即事以明利劍吹毛不柄之持北轅適粵徒勞
何為堯舜理物因利除惡鯀堙洪水彝倫攸斁勢順則強氣
順則舒天地順動百度弗渝待時而行處順以守君子作箴
敢告左右

守口如瓶箴

吳君以時書守口如瓶以自警徵予言為作箴曰

維人有口瓶亦有口瓶口弗守喪厥受人口弗守速厥咎口
乎口乎其禍福之門而一身之樞紐乎人有瓶也尚克固之
胡然有口而不知度之維言如泉維口如隄有出弗稽為河
為谿激石揚泥遺不可回故曰好言自口莠言自口又曰君

子無易由言耳屬于垣守口如瓶永矢勿諼

敬齋箴并序

子蒙古氏宗道之先出自山西而以儒世其家故名其燕居之室曰敬齋載世德也先正有言曰經禮三百曲禮三千一言以蔽之曰毋不敬敬也者其萬事之根本與故聖人之語君子惟曰脩己以敬故禹湯以克敬而王桀紂以不敬而亡自天子至于庶人豈有異哉故曰穆穆文王於緝熙敬止又曰昊天曰明及爾出王昊天曰旦及爾游衍敬也者不可湏臾離也宗道勉乎哉克念作聖敬而已矣作敬齋箴其詞曰

心敬則存而不敬則昏事敬則立而不敬則跲克臧自我否臧自我如之何以可維謚維專式莊弗僂臧之淵淵出之虔虔俾中不偏有握勿捐既悠既堅無不顯或愆無息弗乾熟之者聖守之者賢故曰敬勝則吉怠勝則滅敬而無失聰明睿智皆由此出事神治民舍是無術是用作箴以謹燕昵

官箴上

維天生民儷儷蚩蚩有欲罔制廼豹廼螭爰立之君載作之師式養式教毋汨秉彛嗟爾司牧代君撫綏君祿我食君令我施邦本弗固庶事咸墮受寄匪轄敢不肅祗治民奚先字之以慈有頑弗迪警之以威振惰獎勤拯艱息疲疾病顛連

我扶我持禁暴戢姦損羸益虧如農植苗蚤夜孜孜澇䟽旱
既無容稗秕如良執輿順以尊之無俾旋濇彊策以馳慈匪
予愛帝命溥時威匪予憎國有恒規弱不可陵愚不可欺剛
不可畏媚不可隨無取我便寘人于危無避我謗見義不為
天鑒孔昭民各有思惠之斯懷推之乃離譽不可驕器惡滿
歌謗不可怒退省吾私人有恒言視民如兕無友厥好以暴
予知是用作箴敢告執羈

官箴中

在昔隆古分封國都付之以民俾養勿瘠上下協心各保乃
區明庶考績昭哉範模秦廢聖制代德以徂刀筆之權始歸

吏胥弄法舞文聾癡瞽愚流波至今一任簿書行立公庭如
鴈如鳧我欲是求我利是趨摩揣官情以逞覬覦官惟好貨
我其以直官惟好名我逢以諛官惟畏嫌我疑以汙官惟好
惰我淫以娛官惟好猜惑以多途官惟好威道以摭摭語默
有為俯仰有須規容察辭助忿乘愉法度盈口奸邪滿軀蠱
智迷昧欺庸陷迂俾好作惡以紫為朱未獲官心嫗嫗儒儒
亦既獲止如登天衢傲兀民士憑陵里閭惡積禍來官與之
俱人有恒言遇吏如奴堅防固隄猶恐或窺矧曰聽之百姓
何辜是用作箴敢告僕夫

官箴下

無庸余官箴下

無謂余明人莫能昧離婁善察不識其背無謂予能人莫敢欺校人烹魚子產弗知立事惟公燭詐惟誠小節勿固小慧勿行無矜我廉守所當為無沽我名以生衆疑何以簡訟决之使通何以弭貪慎檢乃躬去讒斥倭遠吏近民待人以寬律已以勤無咎人弗信忱至斯孚無患人不聞惟德不孤德以進善威以挫姦德不可偏威不可煩無謂彼富我必極之無謂彼貧我必直之持心如衡以理為平無為避嫌以縱無情人有恒言為臣不易是用作箴敢告有位

贊

靈峰寺植木贊

靈峰寺有松杏與樸並植焉劉子見而感之為作贊曰

杏葉葱芊有子可以實蓬松枝扶疎有苓可以引年樸狀如檇衆蠹所穿擁腫液瞞不可以鐫胡並植于庭混厥醜妍明堂求材般趨爾先松戕杏割樸獨宛然嗚呼樸乎孰女之憐維女之全抑棄於人乃獲乎天耶

畫龍贊

觚其角蒼其鱗蚬蚪其身胡為乎而神至陽之精律與天倫形而求之惡識其真于嗟龍兮

碑銘

北嶺將軍廟碑

諸暨東北百里為蕭山縣其山曰北幹之山浙水帶其陰湖
湖匯其陽東望會稽至于大海日之所出其上為星紀婺女
之辰故其神為甚靈能祛疫癘作雲雨人有所祈必應故立
廟于其山尊其神曰北嶺將軍歲時祠焉宋徽宗時方臘反
睦州自睦入杭具舟將渡江吏民大怖相率禱于神比寇至
即有風逆其舟且見甲士列岸上甚衆乃止不敢渡寇平知
越州劉幹上其事于朝賜額曰武佑廟後封顯應侯再封靈
順顯應侯有元至正十二年妖賊入江浙行省烽火通于蕭
山百姓驚駭竄市井皆空主簿趙君某至縣甫八日即自往西
興募民備禦而江上守兵甚寡弱無賴子競起為劫且應賊

衆洶懼君詣廟卜于神神許之吉衆心稍安君乃分遣人捕
無賴子為劫者悉誅之有自賊中來言賊欲遣兵攻浙東見
江岸列甲卒旗幟如睦寇欲渡時以故畏憚無東心及賊退
邑人皆德趙君趙君曰吁茲惟神之功予何庸焉明年夏天
旱君往禱又輒得雨衆益信神之靈而大敬趙君之能以誠
感神也廟在山之岡歲久朽壞惟神所居室獨存君每至廟
謁念無以報神貺乃以其俸錢作新廟邑人亦大喜爭致助
焉十有五年春廟成為堂三間三門兩廊像設器用無所不
備惟所獨存堂仍其舊繚以垣墉甃以瓦石植以嘉木丹堊
輝映吏民趨走承祀益肅以虔時三月壬寅予自杭還越過

蕭山而廟適成故趙君請予記按祭法有能禦大災捍大患則祀之今神能降雨澤蘇枯槁又能陰力却賊以能保全其民物所謂禦災捍患孰有大於是哉廟而祀之誰曰不宜趙君能愛其民故能以敬事神而獲其佑可尚也矣予故喜而為序其事復為之歌俾祀神焉其詞曰青山兮幽幽綠蘿含煙兮樹木稠望夫君兮悵悠悠巖阿寂寥兮使我心愁雷為車兮雲為馬輕霞動兮江色赭神之來兮風振野吹竹兮彈絲女巫舞兮紛陸離奠芳醴兮薦潔粢留靈脩兮牢純禧驅魃蠱兮逐狼虎弭毒沴兮時暘雨禾麻成兮息桴鼓物既備兮禮無愆和熙洽兮洞淵玄為城為堡兮式恒且堅保佑我

民兮樂以永年

嘉興路重修陸宣公書院碑銘

士有以一身任社稷之安危一言迴天下之趨嚮蓋其智足以識事機其誠足以動人心故能出入危邦扶持庸君寵之而不阿違之而弗懲知有國而不知有其身若是直可謂大臣哉孔子稱大臣以道事君不可則止其或先蒙君之知而期盡心以報効知禍而不避知難而不止若唐陸宣公者其去就雖殊而其揆一也孔子曰篤信好學守死善道宣公以之吾常惟唐德宗以猜防小智行多欲之私信讒邪如心膂視貨賄為性命臨患難則姑息一施處安佚則嫌疑百出以

致藩臣叛命士卒離心播遷困厄而卒不亡及觀唐史稱其
出居艱阻之時謀猷參決一出于公又稱奉天所下詔書雖
武夫悍卒無不流涕多公所為然後知其得人以扶持也昔
者隨有季梁不滅于楚衛成公有甯武子不死于晉無競維
人不然殆哉况公之言德宗不盡用也而僅用其二猶足
以轉危為安易敗為功使其能舉國以聽公周宣漢光不難
繼矣惜乎其中信用群小而棄公也公歿而奏議行於天下
今天下之言特務論政事者莫不宗之然則公之志雖暫屈
于一時而終伸於萬世公之言雖不能以寤時君而足以淑
後人則亦可以無憾矣夫公浙西之嘉興人嘉興郡學舊有

公祠其詳見于呂公祖謙之記而郡城之東鴛鴦湖上又有
宣公書院其地有橋曰宣公橋故老相傳宣公實生于此故
於此立祠以祀公至宋景定癸亥始以祠堂為書院丙子之
歲書院延燎于兵而公像故存衆白郡迎置于太初堂因以
堂為書院大德九年濟南趙魯為山長病其簡陋始改作之
其詳見于牟公灝之記自是城東故址遂廢為墟泰定中有
僧賄學官請佃而建庵焉後至元二年庵災地復于書院是
歲六月其僧復賄有司剏庵如故山長雖爭之弗能得也至
正十四年宣徽院判海岱劉公貞受命為嘉興路總管至則
首治學校之闕顧書院陋且朽欲新之而址隘弗稱乃用推

官方君道聲言命所司督其僧撤庵歸地復建書院其中為
先聖廟兩廡儀門東西禮亭靈星之門具其西為宣公祠祠
西為室東鄉以祀郡之先賢其外為三門廟東為講堂其前
軒仍舊扁曰仁義之堂以藏宣公奏議謂其言無非仁義也
西齋以延師教弟子又增買蕩地若干畝以益廩膳庖厨舍
溷各得其所將成而公改除海道萬戶於是以屬之方君方
君力贊成之經始于至正十四年四月竣事于十五年二月
董其役者嘉興縣丞善慶路吏施淵碩選及前山長王玘任
奔走者直學張惟仁學吏沈雋也既成使請記于劉基惟孔
子明王道以教萬世宣公學孔子者也故其術業一本王道
昔人以宣公祠為書院有以也夫劉公用方君言撤浮屠以
復書院可謂能排異端植正道者有功於世教矣於是乎本
而銘之曰孔子大聖不遇于時既沒之後為萬世師宣公大
賢忠而見疑降及異代人以為規有德無位用無所施用而
弗信惟禍之隨詭遇有獲君子弗為身勳道光雖止不與郡
守孔良百廢咸支爰崇其宮又嚴乃祠俾民觀者式是今儀
勿替後人尚永無虧

墓誌銘

劉顯仁墓誌銘

至正八年予初寓臨安交友未盡識也求士於天台向中立

得四明劉顯仁焉與之交侃侃如也時杭學教導職廢不擇有學行輒介有權力者或以賄營為之既弗稱旨惶懼自退郡因令教官選文學之士不奔競者具禮往致聘顯仁與焉顯仁曰吾心實不樂為此今郡守以禮招予予當為斯文一出然不能久也居數月竟以父病辭去明年乃以詩經領鄉貢弗偶于春官歸侍父館海寧州賈希賢之義塾明年七月得賜疾疾二十日卒且卒無他言惟以父老弗克養為恨顯仁名子青家世居四明之黃甘里曾祖諱三聘祖諱圖南仕宋為秘書校勘官父名景元讀書作文為鄉先生母舒氏娶史氏無子先顯仁五年卒顯仁既卒乃以鄉貢進士除書院山長顯仁生於某年某月某日卒於某年某月某日有詩文若干篇顯仁家甚貧而性耿介寡所與交其平生之最相知者陶凱中立賈執中希賢及基是為銘銘曰

行成而不詭學成而不及仕猶有老父而無弱子嗚呼其死自古有此命也匪咎

海寧應和卿墓誌銘

四明劉顯仁病篤遺言于其叔父景儀以其友人應和卿之墓俾求銘于劉基曰先生知予心信予言且無妄許可於人其為言必當垂於後應君長者生與予交沒予不得誌必屬之先生先生當不我遺以不朽我友我其無憾矣夫明日顯

仁卒景儀來致其言嗚呼以顯仁之才之德予方期其用于世以澤夫人乃弗克遂以死痛何如哉尚恐銘其友之墓雖然不可辭也遂涕泣而銘之謹按君姓應氏聞禮其名而和卿其字也應與邗晉同本於周武王之穆後因國為氏有二連者以文章名于漢魏君之所自出也今杭之屬州曰海寧鄉曰長平里曰黃崗君之所居也會祖某祖某父某君之世也鄒氏君之母也沈氏君之妻也曰元亨文彬元善君之子也妙靖適郭某君之女也曰擇曰某某君之孫也幼失母氏育于祖母周以成人君之命于天也勤于田儉于家孝于親睦于鄰不角勢以陵人君之脩于身也故宋咸淳甲戌二月二十有二日君生之辰也有元至正辛卯五月四日君卒之日也四百六十有五甲子君之壽也海寧州長平里之草營岡君之墓也至正辛卯某月某日葬之日也銘之者枯菴劉基也銘曰

彼夸之順聲騰致隨此逐之足視忽趾觸弗逐弗奪或于加不夫其全夫復何嗟

紫虛觀道士吳梅澗墓誌

括有高士吳先生諱自福字梅澗為吳興人其先評事公感因仕家于括其子孫遂為括人五世祖安國故宋釋褐第二人歷官至太常少卿使金國不屈高祖挺承節即安撫

使司將領復使全國曾祖嗣矣迪功祖有光父良之皆不
仕先生生而敏慧好清淨不飲群兒婚父母甚器異之謂其
有仙風道骨稍長遂命入紫虛觀受業邦彥先生為道士讀
道德黃庭咸通其大旨及長德行會書自達官貴人以至于
市里細民無不敬愛天師正一真人聞其名授號崇德清脩
凝妙法師玄教宗師亦昇號教門高士金闕紫衣主領觀事
先是觀燬于兵繼作極草率及先生領事乃重脩三清殿建
藏室新作山門既成復建通明寶閣以祇奉昊天上帝其下
為演法堂於是觀宇粲新山水為之增氣先生之力也先生
性孝友能愛人觀去其居半舍二親在時必日親覲省奉其

不置親沒喪葬皆如禮與其兄相游處每眷眷不忍舍二
弟早死則撫育其孤周恤其空乏無少間其兄之二子能讀
書則蚤夜勉之曰吾家世簪纓更值時變門戶寢衰吾已委
身方外不復能力學以續先緒其青會員在女女惟勿懈尚克
遂吾願既而世昌中乙亥鄉貢世德中丁亥乙榜如先生志
焉先生又自名其室曰知止客至輒邀坐具酒食不極歡不
已同門陳樵隱老病先生躬為奉湯藥侍寢興數歲猶一日
及卒為治喪墓曲盡其情凡其他所為大槩類此故領袖教
門垂五十年大小咸敬服無間言至正十五年冬十月丙申
卒年七十有五弟子王君采先生二年卒於是君采之弟

子梁惟適及惟適之弟子王有大相與奉祀墓于觀之南岡是歲十有一月丁亥日也基年未弱冠時讀書栢城中聞紫虛山水之嘉因從數朋友往游之先生先生即束帶出與偕游過一所必指曰此某所此舊為某所今為某作於某人實某時無不誠且悉游畢登肴速觴主僕皆酣飲乃送至溪澗無毫忽怠慢意基後每與客往先生輒相待如初蓋是時鄉里之稱仁德長者莫不曰吳先生焉丙子之歲基宦游他方不獲復見先生今年春歸栢而先生已矣不亦傷哉於是墓已七月而惟適持世昌狀來請銘基既蒙先生知弗敢辭乃為之銘銘曰

惟吳之先自周出弟兄來東開邑國支分蔓延綿厥陔長沙保民有功績河南治平為第一前有季英後處默安棲蒿萊食水藁聲華章章在文籍賢良代生莫具述豫章真人純孝德以扇渡水神輔翼公然飛升當白日於休先生發往蹟保合至真去污濁收藏精神歸閭寂金蛇守門遵皇極二六益一靈降質龍離于羊牝馬逸大衍之半返冲漠好溪南陵高以蔚少微四星光景接其上有松下有栢中有佳城錮以石地久天長保玄宅

吳孟思墓誌銘

至正十五年春三月漢陽吳孟思卒其冬十有一月翰林待

制致仕申屠公以子昭來泣拜于劉基已公乃代之言曰昭之先人以文學出入縉紳間縉紳之士揚名當世者無不與交游先生所知也今死而家無貲不能求名于大官請以屬先生基居杭時嘗與孟思游而善故不能讓而誌之曰君諱馭字孟思先世家濮陽譜亡莫詳其系六世祖忠仕宋為殿前司統制官靖康之難從高宗南渡江始居杭州高祖允昌宋左武大夫忠州防禦使魯祖佐承信即御前東庫使祖清成忠郎殿前都指揮使父埴以京官子弟恩授迪功即至元十三年宋亡幼主歸命凡趙氏及其臣僚之子姪咸北覲京師迪功與焉留十餘年復歸于杭配王氏生子三人孟思其

長也孟思少好學工翰墨尤精篆隸凡歷代古文款識制度無不考究得其要妙下筆初若不經意而動合樂度識者謂吳子行先生趙文敏公不能過也故四方來求書者日衆出輒為好事者邀止止或彌年月去則隨所至有足摩礪孟思悉應接不倦孟思事父母甚孝母王氏先卒越二十有六年而父卒年八十有九家無恒產而喪葬咸得盡禮二弟皆仰給孟思孟思又好賓客樂周急故金帛日至而篋常無儲是歲以疾卒于崑山州之寓舍年五十有八歸葬于湖州武康縣之封禺山從先域也配徐氏先二十有四年卒至是而合葬焉子一人即昭也孟思為人外不與物忤而內甚剛介所

交多達官而略無求為進意自號曰雲濤散人所著述有雲
濤萃藁說文續釋集古印譜傳于世銘曰四千五百五
孰成其名而不侈其齡維家弗真以鑠厥貞有悠曷微昭以
斯銘

王子明墓誌銘

君諱坦字子明姓王氏其先會稽人由會稽徙括之麗水曰
玉溪君焉故遠為括人曾祖森祖祀父傑皆隱不仕守分務
本以致蕃裕君貌峻整而心坦夷善居室州閭族人無不敬
信能與人交時賢大夫如胡公汲仲趙公子昂李公仲賓皆
相好讀書務知大義常曰士生不獲罪於親戚鄉黨使得自

娛于一丘一壑足矣寵榮權利非吾願也至正十五年九月
日以疾卒年五十有九且卒命其子曰我家世儒者我死女
當以時斂葬我母越禮毋用釋道士以違聖人教且誣辱我
配劉氏先四年卒年五十有七以某年某月日合葬于戴村
先塋之側子二人長曰玠其次曰瑾瑾早死君卒之明年君
之從弟堯以玠來泣拜于劉墓請銘其墓且曰吾兄有才學
宜用世澤物乃閔不顯斯為可憾基曰不然洪範稱人之福
有五民鮮能兼也今君年六十不滿一不為夭有田宅以足
衣食不為貧守已而不惡於人不為無德世治而生世亂而
死生不見戈兵而死在正寢不為不幸夫何憾乃為之銘曰

生不勞其形而以善名死不離于否克全弗毀誰如其祉以
覃孫子不慮人不慮世不慮

處州路教授吳府君夫人梁氏墓誌銘

夫人姓梁氏處州麗水縣人也五世祖汝嘉宋建炎初知常
州武進縣高宗南渡至常官吏皆散走公獨不去由是見知
升通判州事累遷戶部侍郎言金人難與和親及東京留守
孟庾不可任用忤用事臣意進權戶部尚書而諷言者彈之
未幾金果背約孟庾以東京降如其言終寶文閣學士右通
議大夫致仕追贈少師爵縉雲郡公曾祖溱宋朝奉郎通判
平江府事祖梓父榮國好學有文值世變不仕母蔣氏宋文

林郎常德府龍陽縣丞昕之女也夫人年二十八嫁為今將
仕郎處州路教授吳君虎孫妻吳君先卒卒後二十年是為
至正九年而夫人以其年九月壬戌卒年八十十月巳酉祔
墓于教授君之墓墓在青田縣鳴鶴鄉之擇山子男二人長
士弘次士毅士毅早卒女二人長亦早卒次適葉詵孫男三
人支生本生棣生女二人夫人能讀書每暇日必召子孫立
堂下講經史大義疊疊不倦故其子若孫皆讀書為儒者銘

曰

維梁之先因國為姓叔魚師孔侯封千乘統守九江竦著七
序政既可稱言亦有緒伯鸞清節文貞純孝賢良代生可則

可效侃侃夫人少師之孫載其靜壹以配儒門儒門有秩淑人是宜兢兢婦道媿媿母儀孝慈既脩壽考以寧詩書之訓子孫是承擇山之原其土孔阜既妥厥靈必大乃後

陳處士墓誌銘

處士姓陳氏名莘字希尹世為處州麗水縣之來儀鄉人曾祖某祖某父某皆守分樂善以繼承其家業故世以德稱于州里至處士而家益裕行益謹推餘濟急雖數不吝邑舊有通濟堰溉四鄉民田幾二千頃遇旱勞壅泄必先出已資倡事皇慶癸丑水壞堤數十丈鄉人大感處士竭力昌寒暑董役三年乃完蓋未嘗矜其勞焉至順庚午某月某日卒年六十有一其卒之月日又其生之月日也娶葉氏後十有五年卒年七十有一至正癸巳四月丙辰合葬于其鄉吳院之原子男四人女一人孫男九人曾孫男十人可謂昌盛蕃衍有後也已銘曰

既羸既寧胡為乎公卿位不酬其履多而孫子克緝乃祉垂于萬祀

陳司戶墓誌銘

故宋平江府司戶叅軍陳公以有元至元三十一年二月癸亥卒葬于麗水縣和樂鄉太平里曰浯溪大業之山至正十七年郡人季仁壽始撫其世系行事以為狀而青田劉基為

之誌及銘其誌曰陳氏上世居光州固始縣唐兵部侍郎勳始遷福唐其子孫再世仕閩遂留為閩人至宋有諱敏者幼以孝聞人稱之曰孝童及長有學行累徵不起敏生岳州教授報報生湖南運使禾累贈金紫光祿大夫位特進公高祖也是始居龍泉為處州人是生右儒林郎長沙縣丞輝長沙生左承郎江東總領所幹辦公事增增生鏞官左宣教郎兩浙西路安撫使司主管書寫機宜文字公父也公諱浩一諱汶字養浩少孤母夫人葉氏親課之讀書比長通易春秋百家子史知天文曆數之學寶祐丙辰以祖澤補將仕郎趙葵馬光祖交薦授錢塘尉不就景定辛酉呂文德制置荆湖

辟權鄂州司理咸淳辛未陳仲微薦除紹興文學官俱不就後四年甲戌銓授迪功郎平江府司戶參軍時潛說友安撫浙西疆起之未幾以印氏殺人事忤賈丞相遂解歸鄉里卒年五十有一夫人潘氏葉夫人後司戶十六年卒而夫人奉養克盡孝道子男四人長椿從仕郎汀州路總管府知事次梓卿次相卿出為叔父後次松卿早世女二人長適將仕郎廣東道肅政廉訪司照磨潘弼孫男二人夔杭州路豐衍倉大使據處州路醫學錄曾孫男四人女三人其銘曰昔周大姬女胡公祀虞侯封于陳死丘是都其後子孫為齊楚大夫因國立氏實蕃實層閱秦漢魏晉宋齊以祖勳庸德言代有

不虛霸先開梁王于南隅涉隋唐宋支分蔓敷有自光徒閩
米宅括區踵屬班聯為卿為儒歷世滿五是維司戶未及成
人而失所怙服膺母訓不憚勤苦博貫經史蜚聲庠序而弗
競弗求篤信好古薦辟數不就違母所參軍小試匪溺簪
組不悖法以附勢權臣是忤拂衣長辭歸臥鄉土遂自龍泉
移家城府韜光履素和樂訥訥鄰有赤子貧弗能舉我呼俾
鞠之卒續厥緒里有墓廬為強暴奪取我資俾直之爰復乃
宇姻巨室之嗣請後勿與曰鬼不歆異姓敢餒而祖父惟歿
先厥母痛摧肝腑幸有子有孫克承克敘俾母壽以康如子
與處浯溪之旁其原膺膺其兆孔安其澤孔溥立石鐫銘百

世猶觀

處州分元帥府同知副都元帥石末公德政碑頌

至正十六年春季春月九日予自杭歸至處處父老率其子弟
遮道言分元帥府同知副都元帥石末公政德曰徃微公吾
聚已為墟今微公吾屬已為菹生我者天而活我者公君其
知乎予曰然如父老言夏五月豪酋既來納款父老又率其
子弟造于庭言曰石末公邦家之干城庶民之父母也父母
鞠子罔不殫厥誠厥子雖冥亦鮮不念覆育恩豈由中惟公
有大造于我州肆我民誕軫恤于心曰曷以報公願繪公像
于祠且勒石紀公功用示于州人子子孫孫俾勿忘請為之

文子謝弗能父老進曰君以丞相命布宣天子德威既協于遠人旌庸錄勳當不憚為石末公惠安我民不伐不矜君實知之鑒于庶言式克有徵達丞相心以勸後人時惟至公予弗敢辭乃敘其實而繼以文謹按公姓石末氏名某舊為契州人其先御史大夫以黑軍助太祖皇帝開國滅金為大勳臣有傳在史官四世祖昭毅大將軍事世祖皇帝受命南伐克襄樊有功定爵三品為沿海萬戶佩虎符鎮處婺由是居江南好讀書工文章元統中襲爵鎮守處州大得軍民心居數歲以爵讓于弟而退處天台中至正十二年福建妖賊入處之龍泉處婺大震憲司趣起公領征討事公至龍泉募

鄉兵擊賊走之未幾賊復入慶元公進屯查田使人購其徒為應賊遂撓敗公乘勝掩擊俘斬千計遂復慶元進攻建寧之松溪政和皆克之處州平公乃還歸天台十四年海賊復叛行省憲司又以副元帥起公分府台州公辭不得已乃命鄉民作保伍團結扼要害使賊不敢輒登岸乃聚糧訓兵以圖進討其夏六月朝廷用舊議立巡海道官所以防賊賊乃復請降帥其屬徃衛漕運至京師而妖人黃草堂復扇動黃岩民以報讎為名聚眾搆亂公以計收其渠首六人斬之餘黨皆散為民台州平行省又檄公分府處州時處之屬縣皆有賊松陽遂昌在上游去郡最近冬十月公帥師進討至寶

定而黃壇賊大出焚民居火照山谷公分兵守寶定自將麾下還城而賊已薄河津欲渡先是沿海軍悉發往江東城中畱者不滿數百人又大半老弱公夜部分居民丁壯出拒戰斬不用命者三人衆乃齊奮賊止不敢渡時沿海軍有自江東逃歸者六十餘人公召謂曰女輩能破賊吾當原女罪皆拜曰諾即遣渡水擊賊賊敗走明日退去處州舊有城後壞不脩遺趾蕪沒無捍蔽故百姓尤恟懼會縉雲人又叛從賊焚婺之永康及台之仙居於是處州四面戒嚴乃議浚湟築城而官倉庫盡空晝夜經畫勸勉商賈大家和集其小民俾効力輸貲咸從無違審勢相方商工度材公悉親之官吏左

右無容私焉由是雖勞而無怨者義兵部長吳成帥衆討縉雲賊中途不進乃大掠民財以歸謀亂城中公測知其意即召與計事縛斬之併捕其黨則皆授兵給號將作矣民大驚以為神十有二月公所募義士合擊松陽賊大破之殺其酋餘衆乞降松陽遂昌悉平今予以行省檄與公同議招輯事比至而公處置已各得其當因悉遵公行於是七縣豪酋相繼納款公之力也人謂公生太平時與縉紳為文墨交游彬彬然儒者也及其臨遇事變則智勇奮發運不失機撫循士民則仁慈豈弟惠無不及可謂有用之奇才矣觀其鎮一州未及朞月而功效若是使得制方面專且久盜賊何足平哉

予既敬公德又重父老請於是述輿情而頌之美既往以期
將來也頌曰
維木在山愈久彌長維德在人愈遠弥光公載世勳來鎮有
方佩符桓桓出師洸洸謀先鬼神雷行電翔鋒旗所指百怪
走歲既剪我棘爰固我疆風雨我廬公樹之墻雪霜我膚公
被之裳晨昏起居婦拜兒踰有聚弗睽公賜溥將民愚而靈
群祝孔祥祝公于天錫公壽昌如川源源如岳蔣蔣於千億
年悠哉勿忘

連珠

擬連珠六十八首

蓋聞空谷來風谷不與風期而風自至深山圍木山不與木
約而木自生是故福不可徼德盛則集功不可幸人歸則成
蓋聞志大業者必擇所任抱大器者必擇所投是以梁江湖
不取螭殘之水鈎鯨鯢不適雨盈之溝
蓋聞急雨之漲可以決山及其息也得坻則止怒馬之奔可
以趨壑及其憊也歷坎而瘖是以長平之威報在鉅鹿會稽
之勝終于姑蘇

蓋聞身無恒守勢窮則屈心無定主情急則親是以失時之
言每多謙已墮井之呼不暇擇人

蓋聞石不亂玉惟瑊玦為能亂玉梟不混鳳惟鸚鵡為能混

鳳故妖聲冶色君子遠之必嚴偽行辯言聖人懲之必痛
蓋聞鑒能照物翳之以塵則不可照水能澣物滄之以泥則
不可澣故身明明斯可以使人明明政緩緩不可以責人緩
緩

蓋聞神龍未雲沕淵淪而無悶凡魚得水呈罔罟而莫知是
故聖哲識時以遠悔吝愚蒙競利以冒傾危
蓋聞物無全材適用為可材無棄用擇可惟長故一目之人
可使視準五毒之石可使潰瘍是以穰苴治師智勇貪愚咸
宜其任公輸構厦棟梁枅枓各得其良

蓋聞神龍可豢而不能使之去水飛黃可駕而不能使之捕
狸是故舍人之能而強之以其所不能則叛奪人之好而遺
之以其不好則離

蓋聞民情本質文過則偽人道本直慮佚則傾是故聖人制
禮因自然之序哲士用智利不息之貞

蓋聞觀形于聲未必見形求實于名未必得實是故飄風不
可以調宮商巧婦不可以為家室

蓋聞物有甘苦嘗之者識道有夷險履之者知是以宴安日
久詰戎兵而聽者忽忽老成人喪語典刑而聞者嗤嗤

蓋聞物無專美用之者貴人有異欲諧之者從故冠纓不可
以服鹿而鞮鞢不可以馭龍是以合抱之松無庸於埽人之

國若甕之繭見棄於裸體之邦

蓋聞千斤之象不憚虎而憚鼠三寸之蝎不蠹棘而蠹松是以制必取其所畏防必究其所容故能不震而威于斧鉞不勞而固于垣墉

蓋聞國不自富民足則富君不自彊士多則彊故媚嫉之人庸則士隱而君獨培克之吏進則民夷而國傷

蓋聞春原之草拔盡復生夏厨之蠅驅去還集故時未至不可以彊爭勢方來不可以力戰是以善撲火者不迎其烟善防水者不當其急

蓋聞萬物並育不齊其用而各有用五氣迭運不同其功而皆成功故良珠夜光不假燄于明燭秋華發彩不爭榮於春

風

蓋聞魚無定止淵深則歸鳥無定棲林茂則赴故以道養賢則四方之民聽聲而來以德養民則四方之賢望風而慕

蓋聞剔大蠹者木必鑿去大姦者國必傷是故剖腹滌腸不如無病决蹠解腕不若豫防

蓋聞日月勞其軀而寒暑成君相勞其心而天地位是故宵衣旰食大舜所以致其憂手胼足胝神禹所以忘其貴

蓋聞仁暴殊途非暴無以為仁之啓怨恩異路非怨無以為恩之資是以赤日流金嘉樹之陰穆若玄冰裂石春陽之德

煦如

蓋聞制萬變者在乎專察萬微者在乎定故衆輻寄身于一
轂而衆物納形于一鏡是以人心無貳而鬼神不違王言如
綸而兆民悉聽

蓋聞勢有所格則小柔可以服大力形有所格則大猛不能
破小堅是故食人之虎不能吞一蝟牽羊之縵可以御九犍
蓋聞太陽未升燭火與流螢並照繁霜未降薜花與小草同
妍是以蛟蜃之市不可以稱有國稊稗之秋不可以言有年
蓋聞冬華之木春不必實早慧之子年不必壽故良工鑄金
忌其踴冶智士懷材貴乎藏秀

蓋聞植善傾惡天道之定好安惡危人性之常是以順天之
道則人歸而王逆人之性則天怒而亡故伐罪弔民而周祚
延于孫子興徃樹怨而秦禍發于蕭牆

蓋聞拂雲之松生于一丘之實莖壑之魚穿于一絲之溜是
以忽細事者禍必盈輕小敵者亡必驟

蓋聞善賈者不壅其貨善治者不壅其民故政壅則奸生于
國氣壅則瘍生于身是以山澤不壅而雨暘時若天地不壅
而人物皆春

蓋聞大明普照魍鼠惡其眯目毒霧揚氛蝮蛇喜其得時是
以堯舜至仁而三苗不服桀紂極惡而多罪皆歸

蓋聞執駸馬者不與並逐救危舟者不與同誼是故止闔而平其氣則爭可息聽訟而平其心則事不寃

蓋聞剪紙為墻不可止暴搏沙為餅不可療飢故狗狗之言終非實惠僕僕之拜徒爾多儀

蓋聞時有未至非力所及情有未孚非言可親是以見疑之璞三獻而取刖足不鳴之鳥三年而後驚人

蓋聞人非大聖鮮有全材君欲任賢當如用器惟能避短而庸長乃克奏功而濟事是故驂騮駟以之運磨不若蹇驢

之能干將莫耶以之刈草不若鈎鎌之利小非平刃而風蓋聞俗有厚薄運有廢興故去偽就真者盛之兆捨實徇華

者衰之徵是以豔舞妖歌末世所好奇技淫巧先王所懲

蓋聞理亂絲者必凝其志治亂國者在定其趨是故三軍一心劍閣可以攻拔四馬齊足孟門可以長驅

蓋聞能盈而不能謙者雖成必隳知進而不知止者雖得必失是故附羸以升高而枯蠃螻以任重而躓

蓋聞百廛之市不畜噬犬八家之井不畜舐牛是故士有悍婦則良友不至國有妬臣則賢士不留

蓋聞蛭蟻之藪神龍不棲蒿菝之區嘉穀不植故秦庭虎視而芝歌逸響于商山周嶧鳥鳴而紫氣流光于西極

蓋聞物有準則心為權衡非定靜之有素必紛拏而起爭是

故坐舟視星當察其曷轉執斗較斛當審其孰平

蓋聞奔馬之輪拳石礙之而格迅川之水束草投之則疑是以一星見變能使九服同災一脉爽和能使百體俱病

蓋聞淵之深者流必緩聲之大者響必悠是故政以漸成則民不駭俗以漸變則功不偷

蓋聞植嘉穀必以糞壤鑄洪鍾必以土型故物無必賤而賤不可輕是以海納污然後成其大君納衆然後保其榮

蓋聞大器非一人之私大事非獨力所建是故利不及衆所以起天下之爭爵不求賢所以萃天下之怨

蓋聞心有所憂當儆於事事有所害當慎於為故愚人畏病

而常病智士防危而不危

蓋聞驕者諂之招故諂集而賢路塞暴者貪之使故暴用而

怨府開是以榮夷操軸而若神之嚴棄社稷以如莽來革秉

權而如燬之室與珠玉以同灰

蓋聞明鏡照膽不啓隴廉之顏長劍柱頤不稱佻僂之服是

以狂歌之士遺世若草萊茹芝之老比身如鴻鵠

蓋聞嗜有所專則姦從而入長有所屬則惑由之生故徇功

利者不虞諂詐溺鬼神者獨覺形聲

蓋聞暴於物者衆志之所誅妨於衆者輿情之所疾是以虎

狼墮穿仁者見之而不憐枳棘當道行者過之而必詰

蓋聞截牛之角而呼為豕則雖庸必駭染鷺之毛而指為鴉則雖愚必疑故欺心之言祇足以招天下之恠掩耳之噪適足以致天下之嗤

蓋聞甘雨祈祈不起斷根之木長風烈烈難行折舵之舟故渭濱星殞孔明力殫于興漢洛都鼎震萇弘志屈于扶周

蓋聞天不掩慝而神人之道不睽君不思言則上下之情無蔽是故周史陳詩而八百其年秦令禁語而一二其世

蓋聞天下有道則貴者勞而賤者佚天下無道則貴者佚而賤者勞是以弼亮惟寅而萬姓協睦姻婭膺仕而四方繹騷蓋聞無輿馬者不耻徒步無魚肉者不厭菜羹故性為欲汨

太師誠意伯劉文成公集卷之九

後學麗水何鏗編校

賦

述志賦

鮮余生之眇眇兮荷后皇之深仁具五氣以成形兮受明命而為人體乾坤之粹精兮晞日月之景光漱飛泉之華滋兮
浥灑露之醇英製杜蘅以為衣兮藉菹若之菲菲佩琳瑯之
玲瓏兮帶文藻之葳蕤朝濯髮于蘭池兮夕偃息乎瓊苑
顛馳騫以遠遊兮及白日之未晚駕輕軺之將將兮服蒼虬之
駢駢遵大路以周流兮曳虹蜺之委蛇挾長離而乘鸞兮欸

閭闔之九門豐隆為余先導兮百靈為余駿奔前燭陰以啓
途兮颺凱風使清埃覲北斗于文昌兮朝玉皇于帝臺食玄
圃之丹莢兮澡天潢之芳津激微焱于桂枝兮輕波起而龍
鱗清都不可以及兮留兮忽乘雲而遐征浮江湖之浩漭兮陵
山嶽之崢嶸野莽蒼以多榛兮路險隘而紆曲猥偷息然而
攫噬兮蝮蛇蜿蜒以當陸鬱忡忡以怵惕兮適皇皇以營營
兩滂滂而不止兮霧黯黯以晝冥烏為號以成群兮鳳孤棲
而無所楚屈原之獨醒兮衆皆以之為咎欲振迅以高舉兮
無六翮以奮飛將抑志以從俗兮非余心之所怡長太息以
增歎兮哀時世之異常棄韶夏而非聽兮登傑休于中堂毫

軒于以和羹兮騰鮑魚而寶俎斲榘楠以給爨兮東荆棘而
為柱施罾麗于丘陵兮怨魴鯉之弗獲虎兕逸于山林兮循
戶庭以求索前蒙眛以指途兮疆楊子使操轅命侏儒令舉
鼻方則都盧使守關歲冉冉而將頽兮日曖曖以就昧松栢
摧而根死兮江河化而為滄秣余馬于不周兮整余轡於樊
桐無著龜以决疑兮迷不知余所從搏扶搖以為輿兮攬列
缺以為軒驂青鸞之翼翼兮超烟靄而上浮梁天津以濟河
方睇紫微之神闕開明怒目而電視兮貔豹吼而山裂進無
人以為之先容兮欲自獻而不敢氣勃鬱以憑中兮心惻傷
以惓慄過少微而塵明堂兮就軒轅而陳情書寔碎其隱麟

芳馬辟易而不行訪六符于泰階兮求民極之所在咎繇不
可以作兮競狂直以為罪凌天街以徑度兮違旬始而瞻西
清衆畏讓而卷舌兮孰能白予之忠誠悃悃其無止兮默悄
悄以狐疑要傳說于箕尾兮命靈龜使占之曰有名必有實
芳若形影之相因相福極出自天兮又何尤乎世之人鼎胡
峙而不烹兮旗胡張而弗麾孤不可以射侯兮駟不可以策
而馳衆蠕蠕以朶順兮若頽波之東趨謂羣翟為弗章兮愛
羸豕之負塗方不可刈而規兮白不可涅而黑悲桂椒之芬
芳芳與朝菌而借落殷比干之剖心兮時豈不知其為聖人
魯仲尼之過化兮焉後後而無所容其身由彊義而罹殃兮

惠直道而被黜子胥忠而殞命兮伯夷清而不食將登山而
迷路兮欲涉水而無航東西南北安所之兮顧焉擇其所長
神冥冥而不下兮龜又厭而弗告思糾結而不抽兮意恍惚
以震悼忽濫汜以遐舉兮行將目松大荒羲和不可扳而留
兮恐年歲之弗將駕廣漠而南征兮叫重華于九疑山岑岑
以蔽天兮江淼淼而不可窺遭吾道夫西陲兮聽鳴鳳于岐
陽慨禾黍之離離兮梧桐摧而不生浮龍門以沂河兮訪夏
后之遺跡川瀆混而不分兮鯨鯢起而人立攬駢轡而迴驚
兮謂陶唐之舊京無衣裳以禦寒兮哀蟋蟀之悲鳴心悵悵
以增傷兮神寥寥其若醉淚落落以交流兮憂湛湛而來會

傳說之版築兮無武丁其誰舉夷吾不逢夫鮑叔兮竟淪汝
于囹圄推竭心以股勤兮上介山而立枯種霸越而滅吳兮
終刎頸于屬鏤樂毅升于金臺兮何遁逃而走趙周條侯之
耿介兮卒含怨以餓餒忠有蔽而不昭兮道有塞而不行名
不可疆而立兮功不可期而成李斯上書以相秦兮空自陷
於罪尤買臣顯而慘辱兮豈如負薪之無憂魚赴餌以中鈎
兮雉慕媒而膺鏑鳳凰翔于丹穴兮又何患乎矰弋返余旃
之旖旎兮還余車之鞶鞶采薇蕨于山阿兮擷芹藻于水濱
列玄泉以瑩心兮坐素石以怡情聆嚶鳴之悅豫兮翫卉木
之敷榮挹清風之泠泠兮照秋月之娟娟登高丘以詠歌兮

聊逍遙以末年

弔諸葛武侯賦

天地閉塞兮聖賢隱淪大旱焦土兮龍無所用其神當運命
之厄窮兮堯舜且猶有極委厥軀以隨化兮亦哲人之所感
彼狂猾之縱悖兮履弄莽以滔天亂倫汨典兮流毒為淵夏
少康之不作兮時又無湯與武蕨蕨不可以食兮焉叢叢而
獨處曠三顧之疑惘兮躡高光之所為鳳凰非梧桐不棲兮
于嗟去此其安歸瞻星芒于涓濱兮豈皇天之叛渙日昃不
可使再中兮精極靈而既歎昔尼父之不逢兮寓斧鉞于秦
秋誅姦邪於既死兮開日月之昧幽般紛紛以攘奪兮世不

以之為殃民憂泯滅猶一髮兮微斯人其孰明覽出師之遺
表兮涕泗滂沱其如雨悲逝者之不回兮邈英風于萬古

弔祖豫州賦

汙池汀潭兮蛙黾樂之大鵬天遊兮燕雀謂文奚為狐狸冠
裳兮梟獍堂宇支離節疏兮側身無所嗚呼將軍兮管葛之
倫遭逢庸愚兮有志莫伸委棄九鼎兮烹鉅瓦釜截梁為杙
兮束椽為柱偃背泰山兮依倚培塿圭璋砥砢兮沙礫瓊玖
山陵暴骨兮社稷黍離故臣酸嘶兮行人涕洟卧薪嘗膽兮
此維特矣宣光不作兮吁其悲矣烏號之徹札兮無養由以
操之驂騑不逢伯樂兮與駑駘而並馳系曰龍噓而雲兮夫

豈不能自翔鴻鵠舉翮而千里兮又何必懷此鄉魚遊思故
淵兮鳥棲思故林吾固知將軍之不忍兮惜庸夫之無心日
曖曖以西傾兮時靡靡而就逝雁鷺群而喋呶兮鸞鳳及為
所制世治亂之有數兮天亦無如之何也匪將軍之不能兮
惜不幸而逢此時也死有重祔泰山兮繫生民之休戚吾獨
悲夫將軍兮仰玄穹而太息

弔岳將軍賦

木之顛兮其根必傷人之將死兮命扁以為不祥嗚呼將軍
夫何為哉天地易位兮江河倒流鳳凰夫璣兮豺狼冕旒臣
不知有其君兮予不知其有父嗚呼將軍兮獨銜冤而懷苦

儲何愛而可親兮忠何辜而可戮父兄且猶不顧兮何忠良
之能育臣竭心以為主兮又何可以為仇也天之所廢不可
植兮亦將軍之尤也烏傷兮而欲殞兮群啞啞而拊翼猿狖
縻于機檻兮悲鳴而不食相伊人之有心兮曾鳥獸之不
如忘戴天之耻兮安峻宇而高居信讒邪之矯枉兮委九
廟于狐狸其卑辭以臣妾兮苟殘喘以娛嬉焚舟楫于洪流
兮烹騶駟于中路庸夫亦知其至愚兮兼獨迷而弗寤捐薄
軀以報主兮乃忠臣之素心縱狂瞽之弗思兮又何必以之
為禽屈原貞而見逐兮伍子忠而獲戾固將軍之不辰兮哀
中原之蕪穢弔孤墳于湖濱兮見思陵之牛羊寄遙情于悲

歌兮識忘親之不減

弔秦不華元帥賦

世有作忠以致怨兮曾不知其故然懷先生之耿介兮遭時
命之可憐上壅蔽而不昭兮下貪婪而不貞權不能以自制
兮謀不能以獨成進欲陳而無階兮退欲往而無路忠沉沉
而不白兮心搖搖而不固繫乘黃服鼓車兮驟蹇驢以曳之
胥猛虎于籠檻兮狐狸群而制之衆刻木之枉直兮信讒邪
之流言倒裳以為衣兮涅素以為玄前宕冥令指途兮驅離
婁使從之教養由以彎弧兮繫其肘而引之吁嗟先生兮何
逢時之不辰生不能遂其心兮死又抑而不伸姦何為而可

長兮忠何為而可尤尸比干而獎惡來兮白日為之昧幽重
曰嗚呼哀哉吾安歸乎狹偷升堂兮騶虞以為妖殪鳳凰而
斲麒麟兮糜梁肉以養梟吠狗遭烹兮捕猫蒙醢雄鷄晨鳴
兮衆以為罪忠固不求人知兮於先生其何傷國有忠而不
知兮喟皇天之不祥辭曰莽莽崇丘閔無人兮天高聽遐疏
不得親兮松柏摧折荆棘長兮軒于菘菘充佩縷兮浮雲虹
蜺紛縱橫兮上下阻隔幽不能明兮嗟苦先生卒懼殃兮姦
邪矯枉歸罪愆兮咎繇不作誰與平兮跖犬噬堯理則然兮麒
麟豺狼不同群兮自古有之吾又何嗟兮

伐寄生賦并序

余山居樹群木嘉果駢植人事錯迕斤斧不修野鳥棲息
窠其上茁異類日夕滋長舊本就悴余觀而悲之乃募趨
捷腰斧鑿升其巔剝條剔根聚其遺而燔之於是老榦挺
立新莖濯如若瘡瘍脫身大姦去國斧鉞之時用大矣哉
作伐寄生賦

天生五材兮資土而成汝獨何為兮附麗以生
莖贅蛭嘍兮枝牽蔓縈瘠人以肥已兮偷以長榮狀似小人之竊據兮謂
城社之可憑觀其陰不庇物材匿中器華不羞于几筵實不
諧於五味來烏鳥之唳聒集虫豸以刺耗果被之而實萎卉
蒙之而本悴壇杏無所容其芬芳其棠曷能成其蔽芾豈無

庸而有害矧睚睫之可置爾乃建脩竿升木末運斤生風以
翦以伐脫纏牽於喬竦落纖蕤之騷屑剗蘚膚以除根敷去
毒而刮骨於是巨蠹既夷新莢載蕃迎春而碧葉雲滄望秋
而碩果星繁信知斧鉞之神用寧能裕蠱以生患也耶嗟夫
農植嘉穀惡草是芟物猶如此人何以堪獨不聞夫三桓競
爽魯君如寄田氏厚施姜陳易位大賈入秦栢駭以亡園謀
既售芊化為黃蠹憑木以槁木姦憑國以盜國鬼居育而人
殞梟寄巢而毋食堅冰戒乎履霜羸豕防其躅躑諒前轍之
昭昭何人心之自惑故曰非其種者鋤而去之信斯言之可
則

通天臺賦

并序

昔漢武帝元封二年作通天臺于雲陽亦一時之奇觀
也相如已死無能賦者乃擬而為之其辭曰

惟漢五世握乾統坤三十有二載文教赫乎有截威武振乎
八裔於是乎萬方來同四夷嚮風靡民不寧無神不宗天子
乃駕六龍乘輕雷訪王子于緱山邀安期於東萊泰山封兮
碣石開宣防塞兮萬福來乃立通天之臺臺延列仙于太虛
運巧思于孫卿發脫卒于溫舒景雍土之高明得軒轅之闡
丘役六丁以孱功鑿坤輿以承趺下刻峭以削成兮上辨華
而紛敷屹屹兮似不周之天柱挺挺兮若閩風之瑤圃轟鴻

濛以建標兮拖井泉以為袂日月縈繞於中央兮雷霆鬱律
而在下俯太微之連珠兮見華嶽其如馬雲霧起于太空兮
激倒景而成虹攀帝車而陟三階兮平步閣道而入紫宮建
畢昴以為梁兮繚銀河以為帶覽九州于一目兮游氛却而
清氣會爾乃命方士集王童脯文麟炙輕鴻揚太一之靈旗
撞碧玉之華鍾萬舞波動百神景從奏承雲兮發咸池獻三
嬪兮矯兩龍合六律兮齊八佾美要妙兮靈感通樂具九奏
神交五精紅光下垂燁如流星歛霍揮忽電掣而焱集兮皓
皜瞭晶天輝而日晶方象載之樛流兮伏燭陰以承衡蜚陳
寶使先驅兮曳旄頭以為旌織阿舒徐而按節兮飛廉游揚
而不驚於是萬姓盱盱使者肅肅竽籟戢音鳥獸跼伏風攢
縱以扶輪兮雲霏霏而蒙轂爾乃鏗蒲牢舉神燿聲碎隱于
穹窿兮燎烟熅以燭漢於是乘輿乃升竹宮展嚴禋老聃相
禮后夔正倫張九光之華銜列羽葆以行陳登降有數拜起
有秩八神雍穆而順序千官端儼其如一精誠交乎上下不
二祀事既虔天瑞乃至泰山宵呼白雲書媚露落仙掌芝生
洞房灑銅盤以如飴擢九莖而夜光蓬萊致如瓜之棗玄洲
獻不死之香神筴周而復始與天地同久長於是天子乃罷
然而思湛然而疑曰予否德曷致休徵將天以民為子而王
者代天以理苟能以天心為心天胡為而不喜往者南征北

伐東狩西巡雖曰順天以行道能不運衆而勞民迺命謁者
省四方賑貧窮察饑荒寒者與之衣餒者周其糧六宮罷文
繡之飾上林閑射獵之場老羸無負戴之勞幼穉絕天殪之
傷亘天所覆莫不熙熙皞皞戴帝德於虞唐也遂作頌曰
於玉臺兮赫通天不日成之黔走先燹綿綿兮稷上玄太一
貺兮輝光負拜竹宮兮熙恪虔蕃祉衍兮德澤宣人神和兮
皇億年

龍虎臺賦至順癸酉會試作

龍虎臺去京師相遠百里在居庸關之南右接太行之東
地勢高平如臺背山而面水每歲車駕行幸上都往還駐

蹕之地以其有龍盤虎踞之形故名耳
猗歟太行之山呀雲豁霧結元氣而左蟠於赫龍虎之臺摩
乾輒坤魁群山而獨尊其背崔嵬突嶽森岡巒而拱衛其勢
則昆崙駸駸仰星辰之可捫白虎敦圉而踞峙蒼龍蜿蜒而
屈盤狀昂首以奮角恍飈興而雲屯其北望則居庸巖嶂烟
光翠結攢峰列戟斷崖立鐵駿鳥飛而不度古木樛以相掣
其下視則漲海冲融飛波洗空風帆浪舶往來莫窮想瀛洲
之密迤睇三山之可通彼呼雁戲馬適足彰其陋而眺蟾望
屋局足逞其雄豈若茲臺之不事乎版築而靡一作靡勞乎土功
也想其嶽岑碣磨曼衍迤邐形高勢平背山面水巨靈獻其

幽秘歸邪護其光畧何嵩華之足吞豈岱宗之可擬此所以
通光道于上都揭神京之外壘匪松喬之敢登羞乘輿之攸
止也至若四黃既駕鹵簿既齊方玉車之萬乘蔚翠華之萋
萋載雲罕與九游光彩絢乎虹霓山祗執轡以廣道屏號洒
雨以清埃朝發軔于清都夕駐蹕於斯臺明四目以遐覽沛
仁澤於九垓眇軒轅之梁甫屑神禹之會稽雄千古之盛典
又何數乎方壺與蓬萊慨愚生之多幸際希世之聖明雖未
獲覩斯臺之壯觀敢不慕乎頌聲遂作頌曰
傑彼神臺在京之郊金城內阻靈關外包上倚天猊下鎮地
軸大行為臂滄海為腹崇臺峨峨虎以踞之群山龍從龍以

翼之於鑠帝德與臺無窮於隆神臺與天斯同崇臺有偉鸞
駕爰止天子萬年以介遐祉

騷

九嘆九首

秋風起兮夕露溥浮雲沉陰兮白日晝寒木葉落兮水泉乾
孤鴈鳴兮悽以酸攬余轡兮悵盤桓野蕭條兮行路難豺狼
驕兮狐兔頑蘭蕙死兮荆棘蕃我欲奮飛兮無羽翰援雅琴
兮發哀彈絃斷絕兮涕汎瀾
我髮種種兮颯如其稀我心悵悵兮忽若有遺過吾不能改
兮德吾不能知往者不可悔兮來者不可期進無益于世兮

退將安歸嗚呼已矣兮吾寧不悲

天有田兮不可以耕山有龜兮不可以知咎微刻蒿以為梁
兮削菌以居盤匠石却走兮工垂拊膺登高望遠兮觀四瀛
水東流兮日西傾般紛紛兮各有營我獨展轉兮從夜達明
風飄飄兮揚塵野寂寞兮無人舟何為兮山阿車何為兮水
濱北望楚兮東望秦倒江河兮亂星辰天門窈窕兮重九闈
願有言兮遠莫陳虎豹颺颺兮為喜為瞋橫流涕兮瞻蒼旻
心馮噫兮不能伸麋有角兮龍有鱗空山寂寥兮吾誰與鄰
江無舟兮河無梁隰有荆棘兮而無稻梁鷹化鳩兮雀變隼
狸為貙兮龍為蚓睠長顧兮情紆軫九疑高兮禹穴幽梧桐

枯兮鳳不留山木慘慘兮叫鶴鷓鴣飛兮無所投雲沓沓
兮兩悠悠孰懷情兮知此愁

虎厭肉兮騶虞苦飢獺升堂兮麒麟受羈黃彘蕩兮章甫
承綦箭韶屏棄兮絃筦堯離指玉以為石兮削方以為規天
不可問兮神不可咨繫彼之是兮而此之非有樗在林兮有
樛在道著龜孔昭兮勿遠余思

今夕何夕兮天宇清步逍遙兮仰觀列星河漢皎兮北斗橫
悲風發兮候虫鳴林鳥起兮沙鶻驚長夜寥寥兮何人哭聲
愴悵恨兮不忍聽回身入房兮淚沾纓蛟虬偃蹇兮豺虎得
弧無弦兮車說其衡知不可慮兮誰女令塞淹留兮難為情

履霜思表兮燠則棄之臨河號舟兮濟而置之不網胡魚兮
不弋胡鵠翦雜杞梓兮索灌莽以取木捕猫乳鼠兮僉以為
仁吠狗宵警兮行者怒瞋彈鸞養梟兮莫知其咎斲冰以承
宮兮曷云能久長太息兮有所思林木動兮巢鳥悲山有蘆
兮園有葵心懷君兮君不知

秋天沈滲兮百草黃螻蛄悲吟兮朝榮有芳屣履起兮獨彷徨
徨心悠悠兮懷故鄉原有粟兮陽有禾桂花紅兮蘭紫芽涼
風動兮松栢馨流潦落兮水泉清蔬可茹兮秫可酒集鄉里
兮會親友坐白石兮蔭蒼筠翫明月兮思古人魚豺淵兮狐
首立終余生兮安所求

秋風

秋日慘淡兮秋風其颺白露既下兮繁霜繼之藥離其根兮
葉脫其枝丰者黜頰兮柔者就萎登高望遠兮涕泗滂沱松
栢稀少兮蒲柳何多露不盈條兮霜晨以晞歲晏玄冰兮知
將奈何

思歸引

山高高兮可以望四荒胡嶠爾顛兮而不見我故鄉歲云莫
兮無衣裳車罷馬羸兮僕夫頓僵水有蛟鱓兮陸有虎狼于
嗟奈何兮惟懷永傷

松筠軒歌

彼松之高兮編吾以其操兮此竹之節兮耿吾以其潔兮露
溥溥兮宵明煙霏霏兮曉清風聲我琴兮鳴鶴我笙溜胡為
兮我衣塵胡為兮我纓颺兮颺兮窈以幽駢青鸞兮服蒼虬
吾與元氣兮升降與雲霞兮綢繆逍遙兮相羊終吾生兮樂
以忘憂

漁父歌

江之水兮悠悠深有鯉兮淺有鱖與鯈檜為楫兮松為舟
其釣伊緡兮人誰女九江之水兮娟娟蕙葭吟風兮楊柳含
烟有鱖在穴兮有魴在淵其釣伊絲兮人誰女愆江之水兮
浪浪沫之泔泔兮浮之洋洋有魚與鰕兮可釣以網無遺尔

思兮人誰女傷

麥舟圖歌

我馬飽粟兮彼食不選秕糠我麥滿舟兮彼無以送其死亡
我忽見兮哀不能忘推以與之兮我心乃康我聞在昔兮有
虞夏商一夫百畝兮家有稻與梁生不餓殍兮死有藏嗚呼
今不得見兮使我心傷

山陰王景回友樵齋辭

稻梁離離兮根莠騶騶不可以偶很兮鳳不可以侶臯求
羊無人兮鍾子寂寥哀風厲發兮原野蕭條四顧彷徨兮憂
心且焦若有人兮在山椒携糧負薪兮嘯歌以遨黜陟無聞

兮寵辱不搖嗚呼吾爾群兮去無待子招臨流泉兮倚逍遙
無斤我松兮無使栢也凋

柳橋漁唱二首為黃中立作

春風淡淡兮湖水波波柳乘橋兮青煙滿莎扣予舷兮發長歌
靡白蘋兮亂鴛鴦前有蛟兮後有鼉予往予還兮吁予奈何
彼湖有波兮此橋有柳我維我舟兮聊以搔我首放歌逍遙
兮哀莫予偶有葬在魯兮有沙在籬逝者滔滔兮卷不可以
久綠蘋兮菲菲落花兮點衣江無津兮海無涯嗚呼寂寥兮
吾誰與歸

獲麟操

有獸維麟兮獵者獲之折肢毀膚兮曾不如鹿與麋嗚呼哀
哉兮爾何生于此時周公已矣兮吾能不悲

在陳操

彼山有楊兮彼隰有相彼路斯何兮孔棘且阻玄雲杳冥兮
不日以兩重華寂寥兮誰與晤語茫茫九州兮孰為予所龜
蒙無人兮駕予歸處

白雲歌為良上人作

用貞上人以白雲隱居名其舍蓋取諸唐狄公之言以寓
其思親之意括蒼劉基為之歌曰

青山兮翠微白雲兮孤飛悵遊子兮遠于離不如雲兮倏往

而躡白雲兮容與青山兮欲雨懷予親兮在雲之下雲兮雲
兮歸予從女

秋山圖歌

秋風起兮蕭蕭望青山兮寂寥水泠泠兮出石葉槭槭兮
條氣悽悽兮就寒夜耿耿兮不朝鳳凰兮安之梧桐兮早凋
思美人兮隔江河玄雲冥兮天路遙託宵夢兮遠徂征欵扶
桑兮倚消遙盼青雛兮不來愴怳恨兮魂屢飄願乘風兮絕
浮雲要洪崖兮訪子喬高無梯兮深無航鼉鼉陸梁兮虎豹
驕歸來兮歸來紫芝有蕙兮黃精有苗

梁孝子廬墓詞并序

梁君天民思其父母而廬于墓將終身焉夫廬墓非古禮
也然人子之情有不能已而自我為之君子不非焉或乃
狀其景物而誄歌之則悖於禮而非孝子之本心矣故為
之作楚語使梁君聞之必愀然悲曰他人有心予忖度之
夫子之謂也不其庶乎其詞曰

陟彼岵兮望父陟彼屺兮望母若儀容兮在前恍音聲兮在
後陟彼屺兮望母陟彼岵兮望父愴怳惘兮無聞心搖搖兮
愁苦聞空廬兮山之巔朝松有嵐兮暮蘿有烟其下維地兮
其上維天食思寢思兮以日以年嗚呼魂乎其有知兮矢相
從於九泉

送龍門子入仙華山辭并序

龍門先生既辭辟命將去入仙華山為道士而廷官有邀止之者予弱冠嬰疾習懶不能事嘗愛老氏清淨亦欲作道士未遂聞先生之言則大喜因歌以速其行先生行吾亦從此往矣他日道成為列仙無相忘也其辭曰

青山崔嵬兮烟雲杳冥
田溪鬱紆兮巖谷晦明
脩篁雜樹兮相蔽虧洞壑窈窕兮人不知
清猿警夜兮鶴報晨花開鳥啼
兮長如春陽有芷兮陵有茗
美人不來兮山寂寥瓊芝兮玉
華丹萸兮翠葩紫萼兮黃精
礪礪兮鬚髮蚤連蜷兮登降
剌施幽溲閭礪兮敞晁譎詭
芳蘭桂椒兮或紅或紫松風澗

泉兮金石盈耳梧桐萋萋兮竹實
蒞蒞鳳凰翔鳴兮五色卉
煇望美人兮翠微空山寂寥兮
遲爾來歸霓為衣兮霞為裳
飲沆瀣兮食瑤漿晞正陽兮澡
淪陰精神完兮毛髮香握六
符兮躡九靈被喬雲兮歌洞章
御扶搖兮欵天門詣北斗兮
覲虛皇超鴻濛兮軼希夷造無
始兮逍遙娛召秦女兮吹簫
使湘娥兮彈絃洪崖嘯歌兮
王母啓齒萬舞齊進兮襟佩颯
纒長離前驅兮鸞鳥為使蒼龍
駢駢兮白虎豸豸雷公磅礪
兮列缺旭旭登明堂兮絕河津
上閣道兮攀勾陳過三危兮
繞玄冥出太微兮入西清憇牛
渚兮泛靈槎乘回飈兮以還
家美人兮歸來山中兮其樂無
涯

王彥中哀辭

王氏二子者故宋給事中信之世孫也長曰鍾字彥中
次曰錡字彥和是同母一乳而生二子焉及長俱好學能
文詞至正癸巳其長以春秋經魁鄉貢次榜行省銓授建
德路學錄未幾以力學得疾至丁酉四月卒鄉人咸痛惜
之蓋期其成而不意止于斯也其弟悲哭不能自勝於是
元帥石末公聞之為詩以弔且唁而劉基為文以哀之其

辭曰

朝出兮鴈行暮歸兮相將聯綵服兮上高堂棣華茂兮親樂
康忽秋霜兮夏零淒風發兮凋紫荆同氣兩身兮一死一生
車隻其輪兮嗟何以行窈窕兮悒悒想形容兮不可尋飲泣
兮吞聲恐慈親兮傷心俯重泉兮求隔掩此哀兮何極盡禮
事生兮恪恭子職是謂孝友兮死者瞑目

太師誠意伯劉文成公集卷之九終

新刊欽定四庫全書

欽定四庫全書

臣等謹將... 欽此



[This section of the page is mostly blank with some light smudges and a small circular mark near the bottom center.]

